

## КАНОН АНГЕЛУ ХРАНИТЕЛЮ \*

Глас 8-й.

Песнь 1

*Ирмос: Поим Господеви, проведшему люди Своя сквозе Чермное море, яко един славно прославися.*

*Припев Иисусу: Господи Иисусе Христе, Боже мой, помилуй мя.*

Песнь воспети и восхвалити, Спасе, Твоего раба достойно сподоби, безплотному Ангелу, наставнику и хранителю моему. \*\*

*Припев: Святыи Ангеле Божий, хранителю мой, моли Бога о мне.*

Един аз в неразумии и в лености ныне лежу, наставниче мой и хранителю, не остави мене погибаяща.

*Слава: Ум мой твоею молитвою направи, творити ми Божия повеления, да получу от Бога оддание грехов, и ненавидети ми злых настави мя, молюся ти.*

*И ныне: Молися, Девице, о мне, рабе Твоем, ко Благодателю, со хранителем моим Ангелом, и настави мя творити заповеди Сына Твоего, и Творца моего.*

Песнь 3

*Ирмос: Ты еси утверждение притекающих к Тебе, Господи, Ты еси свет омраченных, и поет Тя дух мой.*

Все помышление мое и душу мою к тебе возложих, хранителю мой: ты от всякия мя напасти вражия избави.

Враг попирает мя, и озлобляет, и поучает всегда творити своя хотения; но ты, наставниче мой, не остави мене погибаяща.

*Слава: Пети песнь со благодарением и усердием Творцу и Богу даждь ми, и тебе, благому Ангелу хранителю моему: избавителю мой, изми мя от враг озлобляющих мя.*

*И ныне: Исцели, Пречистая, моя многонедужныя струпы, яже в души, прожени враги, иже присно борются со мною.*

---

\* В пасхальную седмицу вместо канонов покаянного (или Иисусу Сладчайшему), Богородице и Ангелу хранителю читается канон Пасхи.

\*\* Тропарь Иисусу Христу только в первой и девятой песнях канона.

## Седален, глас 2-й

От любве душевныя вопиоу ти, хранителю моея души, всесвятый мой Ангеле: покрый мя и соблюди от лукаваго ловления всегда, и к жизни настави Небесней, вразумляя, и просвещая, и укрепляя мя.

Слава Отцу, и Сыну, и Святому Духу, и ныне и присно, и во веки веков. Аминь.

## Богородичен

Богородице безвестная Пречистая, Яже без семени рождши всех Владыку, Того со Ангелом хранителем моим моли, избавити ми ся всякаго недоумения, и дати умиление и свет души моей, и согрешением очищение, Яже едина вскоре заступающи.

## Песнь 4

*Ирмос:* Услышах, Господи, смотрения Твоего таинство, разумех дела Твоя, и прославих Твое Божество.

Моли Человеколюбца Бога ты, хранителю мой, и не остави мене, но присно в мире житие мое соблюди, и подаждь ми спасение необоримое.

Яко заступника и хранителя животу моему прием ты от Бога, Ангеле, молю ты, святый: от всяких мя бед свободи.

*Слава:* Мою скверность твоею святинею очисти, хранителю мой, и от части шуйя да отлучен буду молитвами твоими, и причастник славы явлюся.

*И ныне:* Недоумение предлежит ми от обшедших мя зол, Пречистая, но избави мя от них скоро: к Тебе бо единой прибегах.

## Песнь 5

*Ирмос:* Утреннюю вопием Ти: Господи, спаси ны: Ты бо еси Бог наш, разве Тебе иного не вемы.

Яко имея дерзновение к Богу, хранителю мой святый, Сего умоли от оскорбляющих мя зол избавити.

Свете светлый, светло просвети душу мою, наставниче мой и хранителю, от Бога данный ми Ангеле.

*Слава:* Спяща мя зле тяготою греховною яко бдяща сохрани, Ангеле Божий, и возстави мя на славословие молением твоим.

*И ныне:* Марие, Госпоже Богородице безвестная, Надеждо верных, вражия возношения низложй, поющия же Тя возвесели.

## Песнь 6

*Ирмос:* Ризу мне подаждь светлу, одейся светом яко ризою, Многомилостиве Христе Боже наш.

Всяких мя напастей свободи, и от печалей спаси, молюся ти, святыи Ангеле, данный ми от Бога, хранителю мой добрый.

Освети ум мой, блаже, и просвети мя, молюся ти, святыи Ангеле, и мысли ми полезная всегда настави мя.

*Слава:* Устави сердце мое от настоящего мятёжа, и бдети укрепи мя во благих, хранителю мой, и настави мя чудно к тишине животней.

*И ныне:* Слово Божие в Тя вселися, Богородице, и человеком Тя показа небесную лествицу: Тобою бо к нам Вышний сошел есть.

## Кондак, глас 4-й

Явися мне милосерд, святыи Ангеле Господень, хранителю мой, и не отлучайся от мене сквернаго, но просвети мя светом неприкосновенным, и сотвори мя достойна Царствия Небеснаго.

## Икос

Уничженную душу мою многими соблазны, ты, святыи предстателю, неизреченныя славы Небесныя сподоби, и певец с лики безплотных Сил Божиих, помилуй мя и сохрани, и помыслы добрыми душу мою просвети, да твоєю славою, Ангеле мой, обогащуся, и низложу зломыслящих мне враги, и сотвори мя достойна Царствия Небеснаго.

## Песнь 7

*Ирмос:* От Иудеи дошедше отроцы, в Вавилоне иногда, верою Троицескою пламень пещный попраша, поюще: отцев Боже, благословен еси.

Милостив буди ми и умоли Бога, Господень Ангеле: имею бо тя заступника во всем животе моем, наставника же и хранителя, от Бога дарованнаго ми во веки.

Не остави в путь шествующия души моея окаянные убитьи разбойником, святыи Ангеле, яже ти от Бога предана бысть непорочне, но настави ю на путь покаяния.

*Слава:* Всю посрамлену душу мою привожду от лукавых ми помысл и дел; но предвари, наставниче мой, и исцеление ми подаждь благими помыслы, уклоняти ми ся всегда на правыя стези.

*И ныне:* Премудрости исполни всех и крепости Божественная, Ипостасная Премудросте Вышняго, Богородицы ради, верою вопиющих: отец наших Боже, благословен еси.

### Песнь 8

*Ирмос:* Царя Небеснаго, Егоче поют вои ангельстии, хвалите и превозносите во вся веки.

От Бога посланный, утверди живот мой, раба твоего, преблагий Ангеле, и не остави мене во веки.

Ангела ты суща блага, души моея наставника и хранителя, преблаженне, воспеваю во веки.

*Слава:* Будь ми покров и забрало в день испытания всех человек, вонже огнем искушаются дела благая же и злая.

*И ныне:* Будь ми помощница и тишина, Богородице Приснодево, рабу Твоему, и не остави мене лишена быти Твоего владычества.

### Песнь 9

*Ирмос:* Воистинну Богородицу Тя исповедуем, спасеннии Тобою, Дево Чистая, с безплотными лики Тя величающе.

*Припев:* Господи Иисусе Христе, Боже мой, помилуй мя.

Помилуй мя, единое Спасе мой, яко милостив еси и милосерд, и праведных ликом сотвори мя причастника.

*Припев:* Святей Ангеле Божий, хранителю мой, моли Бога о мне.

Мыслити ми присно и творити, Господень Ангеле, благая и полезная даруй, яко сильна яви в немощи и непорочна.

*Слава:* Яко имея дерзновение к Царю Небесному, Того моли, с прочими безплотными, помилovati мя окайннаго.

*И ныне:* Много дерзновение имущи, Дево, к Воплощшемуся из Тебе, преложи мя от уз, и разрешение ми подаждь и спасение, молитвами Твоими.

### Молитва Ангелу хранителю

Ангеле Христов святей, к тебе припадая молюся, хранителю мой святей, приданный мне на соблюдение души и телу моему грешному от святого крещения. Аз же своею леностию и своим злым обычаем прогневах твою пречистую светлость, и отгнах тя от себе всеми студными делы: лжами, клеветами, завистию, осуждением, презорством, непокорством, братоненавидением и злопомнением, сребролюбием, прелюбодеянием, яростию, скупостию,

объядѣнием без сѣтости и опѣвством, многоглаголаніем, злыми помыслы и лукавыми, гордым обычаем и блудным возбешѣнием, имѣй самохотѣние на всякое плотское вождѣленіе. О злое мое произволѣние, егѣже и скѣти безсловѣснии не творят! Да како возможеши возрѣти на мя, или приступити ко мне, аки псу смердящему? Которыма очима, Ангеле Христов, возрѣши на мя, оплетшася зле во гнусных дѣлах? Да како уже возмогу отпущѣнія просити горьким и злым моим и лукавым дѣяніем, в няже впадаю по вся дни и нощи, и на всяк час? Но молюся ти припадая, хранителю мой святѣй, умилосердися на мя грѣшнаго и недостѣйнаго раба твоего (*имя*), буди ми помощник и заступник на злаго моего сопротивника, святѣими твоими молитвами, и Царства Божия причастника мя сотвори, со всеми святѣими, всегда, и ныне и присно, и во веки веков. **Аминь**.